

SACRA CONGREGATIO RITUUM

I

DECRETUM

De titulo Basilicae Minoris

Domus Dei decorem et pulchritudinem Sancta Mater Ecclesia iugiter promovere studuit; quamobrem nunquam destitit aptas edere normas, quibus sacrarum aedium dignitas, iuxta temporum, locorum et gentium condiciones, opportune servaretur et incrementum acciperet. Ceterum christianorum fides et pietas plurimum contulerunt, ut templa, saeculorum decursu excitata, pulchriora et digniora fierent. Praeterea Summi Pontifices iis ecclesiis, quae prae aliis excelleret, peculiaria munera largiti sunt, quae inter, iam amplius centum annos, titulus Basilicae Minoris recensetur. Qui quidem titulus nativa ratione intime connexus est cum titulo Basilicae Maioris, a saeculo tantummodo XVIII Basilicis Patriarchalibus tributo.

Basilicae autem Patriarchales, ut omnes norunt, veluti partes Lateranensis Patriarchii habebantur et sunt; nam, Archibasilica SS. Salvatoris, «caput, mater et magistra omnium ecclesiarum»,¹ est ecclesia cathedralis Summi Pontificis, Basilicae vero S. Petri, S. Pauli, S. Laurentii extra muros et S. Mariae Maioris, ecclesiae ad Summum Pontificem peculiari modo pertinentes habebantur.

Cum vero cuncta ecclesiastica Instituta ad mentem Concilii Vaticani secundi condicionibus et necessitatibus nostrorum temporum accommodanda sint, Sacra Rituum Congregatio, virorum peritorum votis et consiliis collectis, censuit, omnibus attente matureque perpensis, hunc Basilicae Minoris titulum esse quidem servandum, nova tamen ac ditiore significatione inducta, qua et intimius Petri cathedrae devinciantur, et peculiaris navitatis liturgicae atque pastoralis centrum evadant.

Ad hunc finem assequendum, Sacra Rituum Congregatio condiciones et obligationes ecclesiarum, quae Basilicae Minoris titulo

¹ *Descriptio Lateranensis Ecclesiae*, 2: ed. R. Valentini - G. Zucchetti, *Codice Topografico della Città di Roma*, III, Roma 1946, p. 335; cf. S. Petrus Damiani, *Epistularum*, lib. II, 1: *PL* 144, coll. 255-256.

erunt augendae, necnon concessionibus titulo adnexas, accurate recognovit et opportune immutavit.
Quae quidem sunt :

I. CONDICIONES

1. Ecclesia congruenti amplitudine et artis decore emineat eiusdemque forma liturgicis legibus adamussim respondeat.

2. Consecrata sit.

3. In universa dioecesi quadam celebritate gaudeat, v.g. quia corpus vel insignis reliquia alicuius Sancti canonizati in ea asservatur, vel celebris imago ibidem peculiari veneratione colitur, vel ipsa ecclesia refertur ad singularem quendam eventum religiosae dioecesis historiae.

4. Vitae religiosae et pastoralis veluti radiationis centrum existat; hinc:

a) sacrae Liturgiae et praesertim Eucharistiae celebratio omnimoda cum dignitate peragatur, quae sit aliis in exemplum, sive ob liturgicarum legum observantiam sive ob actuosam populi participationem;

b) *Schola Cantorum* ibi habeatur ac praeterea non desit qui fidelium participationem ducere et sustinere queat;²

c) sacerdotes numero sufficientes ecclesiae addicti et confessorii paenitentium necessitati, statutis horis, praesto sint;

d) verbi divini praedicatio frequens fiat nec ad homiliam dierum festorum dumtaxat redigatur.

II. OBLIGATIONES

5. Intra Basilicae fines promoveatur religiosa fidelium institutio, peculiaribus cursibus instructionis, collationum seriebus, ceterisque eiusmodi inceptis.

6. Inter Basilicae opera et incepta plurimum tribuatur studio et vulgationi documentorum, quibus Summi Pontificis mens et magisterium exhibetur.

7. In ipsa Basilica singulari cum solemnitate celebrentur:

a) festum Cathedrae S. Petri (22 febr.);

b) festum SS. Apostolorum Petri et Pauli (29 iun.);

c) anniversarium exaltationis Summi Pontificis.

² Cf. Instr. *Musicam Sacram*, nn. 19-22.

8. In quavis Basilica, pro opportunitate, diebus praesertim festivis, una alterave Missa,, sive lecta sive in cantu, lingua latina celebratur.³ In eiusmodi Missis cantatis gregorianae melodiae vel sacra polyphonia peculiari cura et studio proferantur.

9. In fronte Basilicae Summi Pontificis vel Apostolicae Sedis insignia collocentur.

III. CONCESSIONES

10. Fideles plenariam indulgentiam, suetis condicionibus, acquirere possunt Basilicam diebus infrascriptis visitantes:

- a) in festo SS. Apostolorum Petri et Pauli (29 iun.);
- b) in festo Titularis;
- c) in dedicatione S. Mariae de Portiuncula (2 aug.);
- d) die ad libitum semel in anno electa.

11. In Missis, in quibus habetur participatio alicuius peregrinationis aut magnus populi concursus, dici potest Credo.

12. Signum pontificium, idest Claves decussatae, adhiberi poterit in vexillis, in supellectile, in sigillo Basilicae.

13. Rectori Basilicae super rochetum uti licet mozzetta ex serico nigro cum oris, ocellis et globulis rubini coloris.

14. Ecclesiae, quae titulum Basilicae iam consecutae sunt, condicionibus et obligationibus, de quibus supra in nn. 1-9, pro viribus aptentur.

15. Preces, ad obtinendum titulum Basilicae Minoris pro quavis ecclesia, etiam exempta, a loci Ordinario porrigendae sunt, qui de requisitarum condicionum exsistentia testimonium exhibebit. Ipse Ordinarius in petitione indicabit quot et quae Basilicae in dioecesi iam inveniantur. Precibus demum adnectantur opuscula, libri, imagines luce impressae, ex quibus ecclesiae forma, structura, condicio, sufficienter illustrentur.

Sanctissimus Dominus Noster Paulus Divina Providentia Papa VI, in Audientia die 6 mensis Iunii decurrentis anni infrascripto S. Rituum Congregationis Secretario concessa, praesens approbavit Decretum et auctoritate Sua confirmavit, statuens, ut ecclesiae, quae titulum Basilicae Minoris in posterum obtinebunt, supra recensitas condiciones praeseferant, et obligationes inde consequentes adimplere valeant.

³ Cf. Const. *Sacrosanctum Concilium*, n. 54; Instr. *Inter Oecumenici*, n. 59; Instr. *Musicam Sacram*, n. 48.

Quibuslibet contrariis nihil obstantibus.

Ex Aedibus Sacrae Rituum Congregationis, die 6 Iunii 1968.

BENNO Card. GUT, *Praefectus*

L. ☒ S.

☒ F. Antonelli, Archiep. tit. Idicren., *Secretarius*